

Masasiolah to fiyafiyaw

Adihay ko pa'oripan a siri no pipalafacan a tawki, sacifiyaw sa o mi'adopay a loma', saikoran no loma' safeleng sa ko pa'oripan nira to sapi'adop a waco, sahoni honi sa mitakod to 'adipel kona sapi'adop a waco, mikalat to toforay ho a siri.

O tawki sato no pipalafacan kinapinaay to somowal papisolinga' mirofo tora waco, nika talimaan han noya mi'adopay, o hai ko hai aca, nika caho ka pina a romi'ad, mitakod haca to talapalafacan kora waco nira misacikacikay mikalat to pinapina a tofor no siri. Caayay to pakahadidi koya pipalafacan a tawki tayra sato mikilim to mamiliclic a pahapinang.

Pakatengil to pakokot cingra, sowal sa koya mamilicay, “ Maedeng mitefoc kako tora mi'adopay, manga'ay pakirikecen papirofo to waco nira : Nika ano haenen malahdaw to ko widang iso, citongal kiso to cecay a 'ada. Maolah cifiyaw kiso to 'ada, anoca cifiyaw to widang ?” “ O widang ko malofiyaw ko nga'ay.” Sa ko pacaof noya tawki no pipalafacan. “ A matira aca, painien ako kiso to nisafaloco'an ako, doedo han ko nisowalan ako mireko, caay kaeca ca'ay to karawraw ko siri iso, ira to ko fangcalay a fiyaw iso.”

Haen ha noya mamilicay a patorod, so'elin to ko sowal sato koya tawki

no pipalafacan. Tangasa to i loma' tangsol to mipili' to tolo mimingay ho a siri, sapafeli to wawa noya mi'adopay.

Pakanengneng to satomi' damsayay a siri, mato pakatamaay to tadaekim koya wawa, minokay mitilid tangsol to i saikoran no loma' mi'aning a malawla ato siri'. Nawhan matalaw makalat no sapi'adop ko siri no wawa, sanga' sato to tata'akay no marad a sapirofo koya mi'adopay, masolinga' sato maciker koya waco. Nanoya saraheker sato koya tawki no pipalafacan, caayay to karawraw ko siri nira.

O piaray to faloco' no tawki no pipalafacan, misatapang to palada' to masamaanay pina'adop nira, oya to tawki no pipalafacan a tamdaw pakatar pafeli to titi no siri ato hacol sapaco'ay to mi'adopay, matenes to malawidang to a tatosa.

Ano pakasowal to cecay a tamdaw, i'ayawen miharateng to sakafangcal ko malolalan, pakiitira pakalayap to kaolahan nira. Ikor to mananam to safangcal sato, matini ko papaladalada' sanay ko kalafiyaw, salipahak sato. Ano saromi'ami'ad sa caay pitolas a macacolicoli, o maan ko paherekan, awaay to ko fafana'en to matiniay a demak.

敦親睦鄰

牧場主人養很多羊，鄰居養的獵狗經常襲擊小羊。鄰居不肯把狗關好，牧場主人就去找法官評理。法官替牧場主人出主意，可以避免羊被騷擾，還可以多個友好的鄰居。牧場主人挑選 3 隻可愛的小羊羔，送給鄰居的 3 個兒子。孩子們放學都在院子和小羊玩，鄰居用大鐵籠把獵狗鎖起來，避免獵狗傷到兒子的小羊。從此，羊群再也沒有受到騷擾，兩人成為互相送野味、羊肉和奶酪的好朋友。結局，多麼美好：鄰里之間禮尚往來，其樂融融。